

元故宮遺錄
金鼈退食筆記



金鼇退食筆記

高士奇撰

Aug 28/0602

編主五雲王

編初成集書叢

種一他其及錄遺宮故元

中華民國二十五年十二月初版

章

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

七〇六一上

本館據龍威秘書
本排印初編各叢
書僅有此本

金鰲退食筆記卷上

清 高士奇撰

嘗讀往史所載。秦漢隋唐之宮闕。高者七八十丈。廣者二三十里。而離宮別館。綿延聯絡。彌山跨谷。或至數百所。何其奢侈宏麗可怖也。明因金元之舊。宮闕苑囿。較秦漢隋唐僅十之三四。然皇城之中。卽屬大內。禁絕往來。惟親信大臣。得賜遊宴。故或記或詩。咸自詡爲異數。亦有終身官侍從。未得一至者。聞人說苑西亭臺宮殿。無異海外三山。縹緲恍惚。疑信者半。我國家龍興以來。務崇簡樸。紫禁城外。盡給居人。所存宮殿苑囿。更不及明之三四。凡在昔時嚴肅禁密之地。擔夫販客。皆得徘徊瞻眺于其下。有靈臺靈沼之遺意焉。余自丁巳賜居太液池之西。朝夕策馬過金鰲玉嶺橋。望苑中景物。七閱寒暑。退食之頃。偶訪曩時舊制。約略得之傳聞。又彷彿尋其故址。離宮別館。廢者多矣。脫復十數年。老監已盡。遺蹟漸湮。無以昭我皇上卑宮室約苑囿之儉德。因率筆記之。詳于西而略于東。如小南城葡萄園諸亭榭。雖有存者。總不及書。以余所居在苑西也。紀其興廢而復雜以時事。欲見昭代之盛。存爲太平佳話也。若彼內府衙署監局之載在會典。與訪問未確。其蹟莫攷者。缺而不書。景山則外人之所罕窺也。亦不及書。今余所記。皆都下臣庶旦暮經過俯仰習于見聞。非同溫室之樹。莫可得而言者。乃居者旣以守近而不知。過者又以匆遽而莫曉。余生何幸。移家其間。炊煙燈火。鄰于紫極。使不表而出之。如身到海外三山。茫無紀述。寧無愧焉。康熙甲子夏六月序。

太液池舊名西海子。在西安裏門。周凡數里。上跨石梁。約廣二尋。修數百步。兩崖穹甍出水。中鯨獸。楮欄皆白石鑄鏤如玉。中流駕木。貫鐵絳丹檻。擊之可通巨舟。東西峙華表。東曰玉鍊。西曰金鰲。其北別駕一梁。自承光殿達瓊華島。制差小。南北亦峙華表。曰積翠。曰堆雲。瀛臺在其南。五龍亭在其北。蕉園。紫光閣。東西對峙。層臺反宇。飛簷拂雲。夾岸榆柳古槐。多數百年物。池中萍荇蒲藻。交青布綠。野禽沙鳥。翔泳水光山色間。悠然自適。盛夏。芰荷覆水。望如錦繡。吐馥流香。尤爲清絕。若其春冰乍泮。秋月澄暉。煙靄雲濤。雨朝雪夜。則余八年內直。晨夕策馬過橋頭。獨有會心者。禁中人呼瀛臺南爲南海。蕉園爲中海。五龍亭爲北海。寒冬冰凍。以木作平板。下用二足裹以鐵條。一人在前引繩。可坐三四人。行冰如飛。名曰拖床。積雪殘雲。景更如畫。又于冰上作擲毬之戲。每隊數十人。各有統領。分伍而立。以皮作毬。擲于空中。俟其將墮。羣起而爭之。以得者爲勝。或此隊之人將得。則彼隊之人蹴之令遠。喧笑馳逐。以便捷勇敢爲能。本朝用以習武。所著之履。皆爲鐵齒。行冰上不滑也。康熙癸丑六月九日。賜閣部大臣詞林臺省遊西苑。泛舟飲宴。辛酉七月廿一日。又賜閣部滿漢大臣詞林臺省部屬諸臣。宴于西苑。賜內紵蓮藕有差。己未二月晦日。賜余與張敦復學士。杜近公編修。西苑遊宴。是歲五日。侍宴西苑。庚申七月十三日。命余泛舟苑中。中使鼓棹。所得蓮芡盡賜之。又嘗奉召自私寓騎馬入紫光閣門。乘小舟至瀛臺內殿。對畢。復乘舟至紫光閣。騎馬出。賜荷花鮮魚攜歸。甲子五日。復于舟中侍宴。皆有詩恭紀。

己未二月晦日蒙恩賜宴西苑恭紀四首

瓊圃丹垣裏。璇臺綠水中。山光開罨畫。橋影控長虹。徑轉金銜入。波迴桂櫓通。太平多盛事。浩蕩引春風。

淑景初晴後。佳辰上巳前。藻浮春水碧。花帶曉霞鮮。藉草沾香醕。臨流對綺筵。羽觴須盡醉。天語更頻傳。

亭榭水雲隈。軒楹面而開。地疑仙島近。人自玉墀來。駕鳳雕甍出。疏龍磴道回。賦成慚庾信。忝竊侍臣才。

遠勝東堂會。晉太和六年命羣臣于東堂臨流小會何殊曲水遊。南宋顏延之有三日賜諸曲水賦詩序早鶯啼太液。芳樹繞瀛洲。厚眷

眞無極。深恩迴莫酬。此生懷帝澤。端賴濟川舟。

己未五路西苑泛舟侍宴恭紀四首

新蒲細細滿瀛洲。令節欣承聖主遊。日出金支明兩岸。波開畫艦泛中流。嘉魚已慣迎仙鶴。好鳥偏能識翠虬。香溢堯尊傾湛露。恩深沆漭總難酬。

紅嶼青林閣道重。凌晨霽景散千峯。是日時雨初霽牙檣錦幙懸翔鳳。宋孝武帝渡六合乘翔鳳舟水殿金鋪隱瀨龍。漢書

帝在瀨龍池仗外輕陰常檻靜。筵前積翠入杯濃。此身疑是來天上。瑤島風光彷彿逢。

高張廣樂播南薰。寶幄樓船劍佩分。玉潤鳴泉雲際落。璫簫奏曲水中聞。槐烟密幕依巖障。藻影連牽寫浪紋。共喜昇平邀帝澤。豈同漢武宴橫汾。

仙艾靈絲傳五日。蘭銷玉俎。涸天漿。荷浮小葉團青蓋。榴吐新花簇絳囊。自有輕舸爭奪錦。不須駿馬獻穿楊。舊傳五日有過微臣擬進江心鏡。唐時五日于江心鑄鏡呈獻多恐名慚鵝鷺行。

庚申七月十三日賜遊西苑採蓮八首并序

閨苑秋光得庾肩吾之句。青潭曉靄。廣徐彥伯之篇。舒菡萏於方塘。紅英度影。翫芙蓉於曲榭。碧葉浮香。若斯撫景留連。靡不尋聲唱答。況乎迴翔舜海。在沐日浴月之中。泝泳堯淵。極引水穿雲之樂。檻棲花鷁。非同鷗鷺閒汀。橋落彩虹。不是烟波小艇。微涓莫補。龍渥難名。竊念臣跡本投竿。心隨偃草。似孤根之偶出。品實遜乎亭亭。擬短幹之方搖。榮已邀於灼灼。時則涼飈既拂。大火初流。槎辭巧夕之雙星。冀紀中甸之三葉。覩滄池之滌沔。當秋宇之澄鮮。上乃蔭芝蓋以逍遙。盪蘭舟而容與。白蘋紫葳。到處繁川。翠羽紅鱗。紛來入鏡。尤喜細荷之出水。遍看珠葑之盈房。特命移船。容臣舉袖。纔催進楫。卽分鳬雁之輝。許帶歸鞍。寧羨櫻桃之賜。擎盤散馥。澹齒流甘。緬維曩賢。所談盛事。陪遊瀟灑。亦號殊恩。應制昆明。羣矜絕響。何似飛蝗盡舸。一如漁簑釣笠之輕。兼者仙液華腴。不異菰米薦絲之易。眞屬千秋之浩蕩。未酬畢世之津涯。爰紀八章。敬疏短引。江南靡艷之曲。不敢瀆奏乎宸聰。渚北悃款之言。未足敷揚夫聖澤云爾。

芙蓉池水滿天淵。萍末風輕破浪圓。碧島丹崖方丈裏。有誰來泛採蓮船。

曲渚蒹葭翠作圍。新涼殘暑淡斜暉。輕翻兩槳移舟入。驚起莎邊白鷺飛。

風牕露檻接宸居。水氣澄鮮浸太虛。自是君恩深漱澣。特教天上看芙蕖。
鵲首風回撲面香。青荷葉底摘金房。剖來滿齒流瓊液。不羨仙人掌上漿。
垂虹百尺壓鰲頭。錦石疎花帶淺流。遙見西峰開罨畫。暮蟬聲裏變新秋。
綺岸銀塘倚棹過。鷄頭菱角漾清波。臣今不作西湖憶。煙水菰蘆興已多。
水榭紅闌面面低。玉題金埒隔東西。綠陰交蔭松篁裏。惟有水禽無數啼。
隱隱輕雷送雨濃。迴看柳色映千重。片雲忽斷月初出。歸路時聞花外鐘。

甲子五日侍宴西苑恭紀六首

炎景紆清晷。嘉時奉御遊。金蜺陳綵仗。畫鷁動蘭舟。高柳陰初密。圓荷葉始抽。遭逢近霄漢。身已到瀛洲。

浴蘭傳令節。廣宴啓華池。幙結千花蕊。筵垂五色絲。薰風散珠箔。湛露捧瓊卮。聖德昭恭儉。無勞問水嬉。

島嶼三山外。林塘五鳳西。風藤牽紫蔓。夏木發丹萸。岸轉亭皆出。波平檻盡低。玉螭坊裏望。樓閣隱虹霓。

九重端展暇。遊豫躍龍泉。蒲草沿堤碧。榴花照佩鮮。魚潛知聽樂。鷗戲解迎船。願以池爲醴。懽同在鎬傳。

招涼曲榭東。鳳艦往來通。仙管聞天上。長筵布鏡中。流鶯啼繞樹。亂蝶舞依叢。亭午宮槐影。稀疎落綺櫺。

別命乘輕舫。臨流飫大官。三漿香泛螳。六膳氣調蘭。轉機隨天仗。追羣振羽翰。微班陪絳灌。渥澤等洪濶。

瀛臺舊爲南臺。一曰趨臺坡。林木深茂。有殿曰昭和。殿前有亭曰澄淵。南有村舍水田。于此閱稼。明李文達賢。賜遊西苑記云。南臺林木陰森。過橋而南。有殿曰昭和。門外有亭臨岸。沙鷗水禽。如在鏡中。本朝順治年間。別建宮室。爲避暑之處。向南有亭臨水。曰迎薰亭。後樓九間。樓後有殿。制度質樸。康熙庚申。復加修葺。皆易黃屋。復殿重房。交疏對霽。青臺紫閣。浮道相通。又于水邊。堆疊奇石。種植花樹。層巖小壑。委曲曼迴。蓼渚蘆灣。參差掩映。東有二亭。以樓覆之。隔窗雲霧。捲幔山泉。別具幽致。又作宛轉橋。出水面。遙望流杯亭。水聲樹色。不異三山瑤島。御製詩有畫舸分流簾下水。秋花倒影鏡中山。是也。前作瀛臺門。樓五間。上曰于侵晨。臨門聽政畢。外直講官于此進講。高槐拂檐。塔下立塗金異獸二。製作甚精。左右迴廊各三間。上亦有樓。樓外復接小廊。門內東西樓屋各五間。自池東直房改作之後。凡內廷進講。皆遣中使至南書房召張敦復學士同余。自西苑門內。棹小舟至閘口。復換小舟至臺西亭子。從內左門入。于東邊樓下講畢。復從內左門出登舟。中使送至西苑門上馬。有時召余至內殿草制。或月上乃歸。則賜饌。及池魚蓮藕之屬。瀛臺門下迤北有過船亭。雕簷峻宇。下連丹檻。掣之亦可行舟。直北兩廂。窗檻臨水。爲內大臣

及侍衛直宿之地。再北爲御膳房。自膳房轉東。爲閘口。各種船停泊堤外。自閘口過小橋。向東板橋一帶。直抵池岸。循池而北。至西苑門。古樹幽繆。槐柳茂密。葭莢蒼然。白鷺黃鸝。飛鳴上下。部院諸臣。曉入西苑門。奏事。從苑牆下轉西。過小紅門。別設板橋。夾以木欄。懸設罽網。許諸臣干奏對之暇。舉網爲歡。有得魚者。卽攜以歸。可謂昇平佳話也。

樂成殿入西苑門。循水南行。有太液池。水轉北。別爲小池。中設九亭三島。一亭藻井鬬角。爲十二面。上貫金寶珠。頂兩金龍盤柱。作升降狀。丹檻碧牖。盡皆侈麗。中設御榻。四面皆梁檻。通小朱扉而出。名涵碧亭。其二亭。制少樸。梁檻惟東西達涯際。東有樂成殿。左右檻各設龍床。殿後小室。亦設御榻。明宣宗遊歷處也。殿右有屋。設石磨石碓。二下激湍。水自動。南田穀成。于此春治。故曰樂成。後改殿爲無逸亭。曰豳風。曰省耕。每歲秋成。有打稻之戲。駕幸無逸殿。鐘鼓司扮農夫。饁婦。及田畯官吏。徵租交納詞訟等事。亦知稼穡艱難之意也。明世宗時。諭尙書李時等曰。西苑工俱告完。今日往視收穫。以觀農事之終。于是御豳風亭。召見諸臣。賜宴。宴畢。復御無逸殿東室。曰西苑宮室。是朕文祖所御。近修葺告成。欲于殿中。設皇祖之位。告祭之。時等曰。仁壽殿久已廢圯。一旦整飭。行祭告禮。益見聖孝。嚴分宜嵩。賜遊金海記云。省耕亭上。卽隙地墾田。督農耕之。臨闕則坐此。又有元夕侍宴豳風亭觀燈詩。似曾于此張燈矣。本朝亭殿久不修治。己未庚申歲。上避暑瀛臺。余與張敦復學士寓直于無逸殿之東。小室五楹。茂樹迴環。幽蔭蒼蔚。池水下注。泉聲澎湃。曉烟初散。荷香出水。時步豳風亭。坐石砌上。雨後蟬鳴。風來花氣。涼滿襟袖。以爲身在蓬

壺閨苑間。曾賦西苑侍直詩十首。次年改直廬爲皇太子避暑宮。卽水碓陳列山石。雜植新篁。爲清流激湍。茂林修竹。構亭于無逸殿舊址。曰流杯亭。風櫺水檻。蔓橘飛動。細渠屈曲。潏玉飛瓊。上題曲澗浮花四字。常宴外藩于此。大學士益都馮公致政將歸。賜遊西苑。中使鼓棹至流杯亭。備肴核內酒。飲宴盡歡。益都賦詩紀事。都下榮之。

西苑侍直恭紀十首

碧網丹甍閨苑中。六龍駐輦翠微宮。雲牕近處衣常潤。水檻開時棹可通。路接三山疑泛海。臺高百尺迴凌風。周廬禁衛森嚴列。隱隱仙璫下遠空。林沼蔥蘢帶曉烟。湖光一片漾清漣。殘霞半映金堤柳。靈雨先滋玉井蓮。冉冉紅香迷野鶯。絲絲綠影噪新蟬。當軒止覺涼生袂。早有薰風動客篇。輦道青莎軟作茵。蒼蒼葭菼遍芳津。蘋灣銷夏偏宜暑。桂館招涼不受塵。虹跨長橋排雁齒。閣連飛宇次魚鱗。自慚未是登瀛侶。珥筆叨爲侍從臣。宸極高居最上層。千重雲樹碧煙凝。竹埤花榭逢初霽。藻砌梧枰散鬱蒸。閣下橫經看進艇。亭西寓直許調冰。醴泉炎景真堪避。應勒新銘擬魏徵。千羽懷柔到日南。萬方無事樂桑蠶。銀河鳧雁恩波闊。玉潤莓苔化雨甘。巖際共攀松粒五。苑中齊識柳眠三。樓船矜葆誇西漢。不羨昆明碧水潭。

蓬壺窈窕隔塵凡。曲渚斜開錦石巖。紅蓼晚涼清竹簟。綠萼朝露濕絳衫。游魚得水閑依荇。畫鷁迎風自引帆。正喜遭逢承御幄。光天未敢荷長錢。

朱垣曉啓畫方炎。奏對諸僚禮數嚴。障錦輕籠金勒馬。黃羅高捧綠頭籤。篆浮寶獸香頻起。漏滴銅龍水更添。封事上林思曼倩。談諧忠愛有誰兼。

蕉園紺宇行難盡。藥塢沙州望總佳。霧隱重檐橫翠瓦。泉從西郭入丹崖。懸蘿巧結雙鴛帶。細草爭抽小鳳欽。薄暮林梢明月上。頓教野性愜江淮。

西來爽氣逼新秋。吹面荷風滿徑幽。瀑布水聲喧戶外。黛螺山色落牆頭。霑恩饌給銀絲脰。宣勅人乘青翰舟。遺蹟尙留觀稼殿。君王樂處不忘憂。

勤政樓前幾暇時。古槐夾路影參差。趨朝瑤浦呼船渡。退食天閑賜馬騎。出水蓮房初結子。沉波菱葉細牽絲。何須作記遊西苑。日日螭頭一獻詩。

紫光閣由太液池西南隄。循池而北。舊有臺高數丈。中作圓頂小殿。用黃瓦。左右各四楹。接棟稍下。瓦皆碧。南北垂接斜廊。懸級而升。面若城壁。下臨射苑。皆設門牖。有馳道可走馬。明武宗築以閱射者。名曰平臺。後廢臺。改爲紫光閣。向北門外卽金鰲坊。明時五日幸西苑。鬪龍舟于紫光閣前。看御馬監勇士馳驟往來。走解蹏柳。明愍帝召對閣臣於此。大學士蔣公德瓊敬日草云。召至紫光閣。退出。步至林木間小憩。旁有別館。諸璫坐處。有頰光祿寺送茶。閣甚高敞。樹陰池影。蔥翠萬狀。亦佳景也。我朝仍名紫光閣。向南

隙地。盡植桃杏。仲春之際。芳菲滿目。上常于閣前。殿試武進士騎射。又于每歲八月。中秋前二三日。集上三旗大臣侍衛較射。更設帳殿。次第而入。御製詩所謂隊自花間入。鑣從柳外分也。高等者賜蟒緞一疋。內緞三疋。潞綢二疋。羊二隻。次等者。蟒緞一疋。內緞二疋。潞綢一疋。羊一隻。再次者。內緞一疋。潞綢一疋。癸亥歲。改賜金牌銀牌有差。上刻旌射二字。皇太后避暑。亦曾居此。傍有百鳥房。多蓄奇禽異獸。如孔雀。金錢雞。五色鸚鵡。白鶴。文雉。貂鼠。舍狸。獬。海豹之類。不可枚舉。本朝不此是尙。但給飲啄而已。

芭蕉園自太液池東行半里許。蒲葦盈水。榆柳被岸。松檜蒼翠。果樹分羅。中崇閣廣砌。一殿穹窿。以黃金雙龍作頂。纓絡懸綴。雕欄綺窗。朱檻玉檻。望而敞豁。舊曰崇智殿。殿後藥園。花圃有牡丹數十株。轉西有亭八面。內外皆水。曰臨漪亭。一曰釣魚臺。金魚作陣。遊戲其中。又一小石梁出水中。向西一亭在水際。曰水雲榭。按芭蕉園一名椒園。有宮簪法從人等至此下馬。二石碑。當是世宗設醺時所立。前朝實錄告成。於此焚草。七夕。宮中穿鵲橋補服。設乞巧山子。兵仗局進乞巧針。十五日。西苑作法事。放河燈。甜食房進供。佛波羅蜜。明世宗實錄。十五年五月。端陽節。幸西苑。預命侯郭勛。大學士李時。尙書夏言。候于崇智殿。遣中官賚賜艾虎花繖百索牙扇等物。御龍舟。召助等各登舟。給酒饌。命三臣舟近龍舟行。自蕉園迤邐。至澄碧亭登岸。復宴於無逸殿。盡歡而罷。嚴分宜鈐山堂集載有詔賜金海乘涼詩序云。供事西苑。直宿無逸殿。時溽暑蒸燠。上命中官導五臣。每以已未申前。於金海邊乘涼。是日出迎和門。乘舟泊水雲榭。觀臨漪亭。入蕉園。至崇智殿。畫棟雕甍。金碧輝煥。蒼松翠柏。盤鬱垂蔭。不復知有暑氣。又有金海放燈詩云。

紅燈焰焰水攸攸。此夕真從天漢遊。鸞簫鳳管鳴仙吹。錦纜龍旗引御舟。其二云。恍驚華渚流虹照。宛是
織山駕鳳來。仙人指點瑤池上。萬朵金蓮頃刻開。又有西苑賜川扇詩云。太液池邊暑氣生。海榴英簇絳
霞明。蜀王新貢金花簪。御苑傳呼賜禮卿。本朝順治年間。改爲萬善殿。供三世佛像。選老成內監披剃爲
僧。焚修香火。木陳玉林兩老衲。奉召至京師。會居萬善殿。每歲中元。建盂蘭道場。自十三日至十五日。放
河燈。使小內監持荷葉燃燭其中。青碧爛爛。羅列兩岸。以數千計。又用琉璃作荷花燈數千盞。隨波上下。
中流駕龍舟。奏梵樂。作禪誦。自瀛臺南過金鯨玉螭橋。繞萬歲山。至五龍亭而回。河漢微涼。秋蟾正潔。苑
中勝事也。

玩芳亭在蕉園之西。芳木匝之。今廢。

承光殿在金鯨玉螭橋之東。圍以圓城。設以睥睨。自兩液洞門而升。中構金殿。穹窿如蓋。華榱綺牖。旋轉
迴環。俗曰圓殿。外周以廊。向北。金鯨垂出垣堞間。甚麗。昔有古松三株。枝幹槎牙。形狀偃蹇。如龍奮爪。擎
空。突兀天表。金元舊物也。今止存其一。明李文達賜遊西苑記云。圓殿巍然高聳。曰承光。北望山峯。嶙峋
峯聳。俯瞰池波。蕩漾澄澈。山水之間。千姿萬態。莫不呈奇獻秀。于几窗之前。韓右都御史雍賜遊西苑記
云。圓殿觀燈之所也。殿臺臨池。環以雲城。歷階而登。殿之基與睥睨平。古松數株。聳拔參天。衆皆仰視。時
則晴雲翳空。炎光不流。暖風徐來。花香襲人。倚睥睨而窺。其西以舟作浮橋。橫亘池面。北則萬歲山在焉。
殿廢于康熙七八年間。云有蝙蝠大尺餘者。南向二亭。尙出雉堞。正門閉塞。久不啓。余朝夕騎馬過其下。

輒愛古栝之天矯蒼翠。而于雪朝月夜。更徘徊不忍去云。

承光殿古栝行川東城同竹
監燒葦園韻

承光古栝雙牙樣。蒼皮聳幹參雲霞。纏冬顏色鬱深翠。入春發葉如蔣芽。白頭老監說舊事。西苑園殿頻誇誇。花香露氣接大內。徑路窈窕疑仙家。雕闌四圍粉堞壓。綺窗十而珠簾遮。當時嚴肅是禁地。那許橋上馳麴車。金元舊物歷代重。頽枝半折輕杉叉。侵霜溜雨積歲月。漏鼓聽遍朝元謁。西偏盤曲勢舞鳳。東頭突兀形驚蛇。我行低徊策款段。仰面叫絕聲呀呀。洞門久閉長狐兔。安得啓戶爭投豈。七年千回看未厭。慣聞下直栖宮鴉。使其託根在深谷。但侶澤雉與山麕。肩挑背負不知愛。歌涼牆腳時語譁。常思解襟復科跣。鼾睡密蔭遊義螭。含章之梅靈和柳。止增妖冶豈此加。圍城似甕瓊構廢。或者留意除紛奢。趨朝日日樂水木。往蹟漫比槐排衙。秋宵月皎寒晨雪。每過更覺流連佳。興酣攪轡忽欲墮。疎雨已霽河漢斜。

瓊華島在太液池中。從承光殿北度石梁至島。皆以文磚乳花石雜甃之。巖洞窈窕。磴道紆折。多疊奇石。巖岈岈。其巔古殿。相傳本遼太后梳粧臺。歷金元明。皆有宮殿。爲遊觀之地。今殘石壞礎。猶刻雲物及廣寒殿宇。遼史云。皇城西門曰顯西。設而不開。北曰子北。其西城巔有涼殿。金史宮闕制度云。京城北離宮有大寧宮。大定十九年建。後更爲事壽。又更爲壽安。明昌二年。更爲萬寧宮。瓊林苑有橫翠殿。寧德宮。西園有瑤光臺。又有瓊華島。瑤光樓。元郝文忠公經陵川集。載有瓊華島賦。葛邏祿迺賢金臺集。有粧臺。

詩云。廢苑鸞花盡。荒臺燕麥生。韶華如逝水。粉黛憶傾城。野菊金鈿小。秋潭玉鏡清。誰憐舊時月。曾向日邊明。其下自註云。粧臺在昭明觀後。金章宗嘗與李妃夜坐。上曰。二人土上坐。妃應聲曰。一月日邊明。上大悅。又有壽安殿詩云。夢斷朝元閣。來尋買酒樓。野花迷輦路。落葉滿宮溝。風雨青城暮。河山紫塞愁。老人頭雪白。扶杖話幽州。陶九成輟耕錄。載元時宮闕云。萬壽山在大內西北。太液池之陽。金人名瓊花島。中統三年。修繕之。至元八年。賜今名。其山皆疊玲瓏石爲之。峯巒隱映。松檜隆鬱。秀若天成。引金水河至其後。轉機運甃。汲水至山頂。出石龍口。注方池。伏流至仁智殿後。有石刻蟠龍。昂首噴水仰出。然後由東西流入于太液池。山前有白玉石橋。長二百餘尺。直抵儀天殿後。橋之北。有玲瓏石。擁木門。五門皆爲石色。內有隙地。對立日月石。西有石棋枰。又有石坐牀。左右皆有登山之徑。縈紆萬石中。洞府出入。宛轉相迷。至一殿一亭。各擅一景之妙。山之東有石橋。長七十六尺。闊四十一尺半。爲石渠。以載金水。而流於山後。以汲於山頂也。又東爲靈圃。奇獸珍禽在焉。即今之景山是也。廣寒殿在山頂。七間。東西一百二十尺。深六十二尺。高五十尺。重阿藻井。文石甃地。四面瑣窗板密。其裏徧綴金紅雲。而蟠龍矯蹇於丹楹之上。中有小玉殿。內設金嵌玉龍御榻。左右列從臣坐牀。前架黑玉酒甕一。玉有白章。隨其形刻爲魚獸。出沒于波濤之狀。其大可貯酒三十餘石。今在西華門外真武廟中。道人作菜羹。又有玉假山一峰。玉鑲鐵一。縣殿之後。有小石笋二。內出石龍首。以嚵所引金水。西北有廟堂一間。仁智殿在山之半。三間。高三十尺。金露亭在廣寒殿東。其制圓九柱。高二十四尺。尖頂。上置琉璃珠。亭後有銅幡竿。玉虹亭在廣寒殿西。制度同金露。方壺亭在荷葉